

Kayëta ixinëm ir Timote in Lilaya in

Akayëta aŋo ex akinëm and yëgwën baŋo Pol Timote aŋ. Epela el dëŋ baŋo feland mondako gayikwa anang nang baxo mëne ecës el dam ex. Pol axwitan xwitan baŋo mëne bër fana këbi Kaxanu eni pemërand Atëfëtan and Yesu bën ani kor na eni dind andiyen aŋo xarak abi cëmura ex na. Mëŋ baŋo felaxënënd Timote exo kapina ang šoroda fo. Barikan ebi kwëyëtand bër wër këbi ecampëre, gë batakëra, do gë bër kë yepënënd ekwëta bën.

Er ex gër akayëta in:

End bapela band yël baŋo Timote eŋ: 1.1-2.26.

End ekapina do gë emëlaya ed ekwëta xali gër eŋata eŋ: 3.1-4.8.

Bepelatar beŋ do gë ofelar ol: 4.9-22.

Ecëmar el

¹ Wëno Pol, parëxanda ir Yesu Kërisët hi këme ang yandi këŋo Kaxanu ak. Mëŋ fana ke me tëfëtërand end aniyen and beya baxo ayël këbo yël paß gë Kërisët eŋ.

² Wëj Timote këmi yëgwënënd, wëj ar ex asëniwën ar pëlot gër yomb iram an. Awa Faba Kaxanu do gë Yesu Kërisët, Axwën arebi an, yëlëleni oyekax ol, gë axayënan in do gë obetak ol.

End ecëkwa do gë ekemën eŋ

³ Ašëkwa këmo šëkwand Kaxanu, mëñ ar këmo riyenind ang bano riyeninënd bëxarëk bëram ak*. Ašale këmo šalend gë onden onjekax, do nand këme šalerand yo, hik gëmëd, hik goyat, wëj ašalen këmi šalenënd.

⁴ Mokofi xofi ke do aýandi ýandi ke mi watëdo exe nëngandëraxën, ga këme xwitand ang šar baxi ongwën and baxe felarënde ak.

⁵ Axwita këme xwitand bëte ekwëta ed dal ed xwëta këyo Kërisët el. Ekwëta elo gër Loyis, ejix isoxari ýanawëk, bëtaxënëk gër norix Enis. Do aye nang këme wëj bëte ašot šot këy ekwëta elo.

⁶ Mëñ ex, kemënalil anjëla and yël ki Kaxanu and šalen këmi mokwëtan otaxan añ. Kërey dangangan na këdi kë riwã.

⁷ Enimin angoc and yël këbo Kaxanu añ, and gë ojaŵ, and gë añana, do and gë orenik exo, axo gi ex na angoc and gë anjiy.

⁸ Mal ey torond në end Atëfëtan and Yesu eñ ang këme sorond wëno ak. Deyarayind osede or Axwën arebi ol, kërexì cëfënanënd na. Bëte kërexì cëfënanërand na endam eñ, wëno andepëra andexëm añ. Barikan toroye në end Atëfëtan eñ gë panga ind Kaxanu inç.

⁹ Kaxanu, gë panga inço fexën këbo do waceli këbo oŵënëk ol, xarak ax gi ex na de ga ri këne benjekax, barikan ga fëna baxo exo di mondako në end oyekax or yël këbo paß gë Yesu Kërisët eñ,

* **1:3 1.3** Bëxarëk bër Pol bën Bëšëwif bër bax sëfënd aye end Kaxanu hi bani ang rek gër kayëta ir Bëfilip 3.4-5 ak.

damana exo dixën ngwën in.

¹⁰ Oyekax olo şanayak gërëgako
and şanayaw ko Yesu Kërisët, Afexën arebi aņ.
Mëņ rëxëtëk panga ind ecës in
do necëtënëgu këbo angoben and aniyan aņ,
aniyan and gë ecës këm aņ,
aniyan and këbo nangënënd Atëfëtan aņ.

¹¹ Gë Atëfëtan aņo hi këme afemëra,
parëxanda, do asëyali.

¹² Bëte gër andiyen aņo buņa këme toro ind
këme sorond in, bari axe cëfënan na. Gayikwa
aye nang këme noyo ex ar xwëta këmo an, do
mopëni fëni ke mëne axor ko xor exo kaxa er
xwëtënan ke in, xali yatir akey apelatar.

¹³ Mëlayal eyeyan emënëk ed wëleli këye elo,
gilex eyeyan ed këy sëf asëf gë ekwëta ed xwëta
këyo Yesu Kërisët el do gë aņana and hik gër
ndexëm aņ.

¹⁴ Kwëtayal gër emëkw edey benjekax bend
xwëtënan ki Kaxanu paß gë Angoc Amënëk and
lëgëk gër ola orebi aņ.

End Onesifor do gë ekun edexëm eņ

¹⁵ Timote, anang nang këy mëne đek bër gër
ebar ed Asi bën şapëran ke, ado Fişel do gë
Erëmoşen dëņ gër eng a eņo exëni.

¹⁶ Axwën Yesu mëlayalebî gë axaŷënan One-
sifor do gë ekun edexëm el gayik mëņ laņ baxe
felënd me kemëna. Ado ga hi këme andepëra,
abaņo şëfënan na endam eņ.

¹⁷ Ecëñëxët and yow ko ro gër Rom aņ, aşalara
şalara ke gë ofal osëm xali wat ke.

¹⁸ Awa Axwën Yesu mëlayaleño gë axaÿënan ir Axwën Kaxanu in, xali yatir akey apelatar. Wëj dëñ anang nang këy nëmëc bela ðek ang rëcara ke gër Efes ak.

2

End ðoroða ir Kërisët eñ

¹ Awa wëj cëñ asëñiÿwën, kemënëlexi Yesu Kërisët gë oyekax orexëm ol.

² Do bebër wëleli këye ga këme sëfët mërëxand ir otede odanjëm bën, kwëtënanëlëbi bela bër mokwëta, bër kë xor bën bëte enëbi tëyalind bësëxe.

³ Ang ðoroða iyekax ir Yesu Kërisët fo, mal ey torond ang këme sorond wëno ak.

⁴ Angëmëne ar yëlayak gër oðoroða an aÿandi ÿandi këño eño nënganënd alëngw arexëm an endexëm eñ, axo kwëndand na bend aniyand and bër ax gi ex na ocoroða beñ.

⁵ Ar kë xaşërënd an, ala año cosënd na angëmëne axo tëf ex na şenene bacariya band okaşër bañ.

⁶ Aÿan ar sëwëk gër oşënga orexëm an ÿapëk exo gi aÿanar ar kë yamb er ko xana in.

⁷ Pënilexi er këme rend in: Axwën an ayël ki yël onden ond exi pënixënënd beÿ ðek oñ.

⁸ Kwitayind end Yesu Kërisët eñ, mëñ ar xanik gër ecës an, mëñ ar exo andëwëra and Dafid an. Eño ex Atëfëtan and këme femërand añ.

⁹ Në end Atëfëtan año këme soroxënënd xali fokëra këne nangëde ar wëndërak fo. Bari

eyeyan ed Kaxanu el cëŋ, ala ax kor na exo pokëra.

¹⁰ Mëŋ ex, wëno axapina xapina këme me buŋand toro ind ex yo, eni cotaxën bela bër yata këbi Kaxanu bën apexa and gë enjaran end din ir din aŋ, and ko yëlënd Yesu Kërisët aŋ.

¹¹ Eyeyan elo ed mokwëta ex:
angëmëne gë Kërisët šës këne,
bëte gë mëŋ fo këne liyađe.

¹² Angëmëne axemëna xemëna këne,
bëte gë mëŋ këne wunëde;
angëmëne enëŋo yaxëtaye,
mëŋ bëte yaxëta këbo yaxëtađ.

¹³ Mëŋ ar mokwëta ko bayi,
angëmëne ax bo ex na ga xwëta kënëŋone,
gayik mëŋ din ar hi ko an ko bayi.

End ariyenin ar Kaxanu eŋ

¹⁴ Awa beŋo ŋapëk eyëbi kwitanënd gër Amara, gër lëngw ir Kaxanu dëŋ, mëne eni kwëŷëtand ecampëre ed bend gë ofëcak këm el, ecampëre ed bend këbi nambelind bër obaxët el.

¹⁵ Wëj, kemënal eyëbi tëyalind šenene eyeyan ed đal el, ey canayaxënëđ gër lëngw ir Kaxanu ang ar xamënëk andiyen and fana këŋo fo, ang ariyenin ar aŋo cëfënan na.

¹⁶ Kwëŷëtal bend kë yepënënd bend Kaxanu beŋ, tebël eyeyandëran ed ax bašënënd na ekwëta el gayik bër watak mondako bën, oyeyandëran oŋo fo këbi šapërelind gë Kaxanu.

¹⁷ Eyeyan edebën elo ang ikejën ind kë ŋañënd fo ex. Imene do gë Filet šëf gër bela bëjo hi këni.

18 Bën ga lap këni end d'al eŋ, këni reyaraxënënd mëne anëka xucak ekani ed gër ecës el, do bërëmar wëlandëra këbi gër ekwëta ed xwëta këno Kaxanu.

19 Barikan Amara and rëd ko Kaxanu aŋ, abayi kë bayi, ang rek Oñëgw Omënëk ak: «Axwën an anang nang këbi bër xwën këbi bën.» Do «Ar kë ñebëtand yo exo mac oŵac or Axwën ol, ŋawëtalexo osëmbak ol✧!»

20 Ar gë napul an, odëyamb od šot ko gër iciw̄ indexëm ok mar od otëx ex do mar od gë omak, ax gi ex na odëyamb od kaŋe do od kodī fo. Odëyamb od xalanj ok, laŋ ko rixëraxënënd, barikan odëyamb okëbënaxik ok, gë bakey band ofëna fo ko rixëraxënënd.

21 Awa angëmëne ala exo w̄unëta do exo teb betëmbak beŋ, ata ko hi ang edëyamb ed këni rixëraxënënd yatir ofëna fo, ata ko hi ar yëlayak gër Axwën, do paß gë ola orexëm ol, ko ýana exo dind benjekax bend ex yo.

22 Awa wëj Timote, kwëyëtal betëmbak bend këni rind ocambenjar gë odënaŵ beŋ. Calayind or šenene ol, gë ekwëta el, gë aŋana aŋ, gë angwëlëra aŋ, do gë oyekax ol, andamat gë bela bër këŋo šalend Axwën Kaxanu gë emëkw emënëk bën.

23 Koranëlëbi bër këbi ýandind en yeyandëra bepëñirëx, bend gë ofëcak këm bën. Anang nang këy mëne beŋo gë ekeýër fo kë ñatand.

24 Xarak ariyenin ar Axwën an ax ñap ex na eni keýërënd gë bela. Ecëñëxët, er ýapëk exo gi:

✧ 2:19 2.19 Bandopën 16.5

ar bēngw kējo onden gēr bela dēk, ar xamēk osēyali, do ar kē buṅand mbaṅ.

²⁵ Gilexo ar kēbi wērēšētēnd endēmane fo bēr xorēk ecampēre bēn, do exo yēland mēne Kaxanu arēca kēbi rēca eni nēngwēt ola orebēn ol ebi pēnixēnēnd dāl in.

²⁶ Gilexo bēte ar kēbi wērēšētēnd endēmane fo ebi bakaraxēn onden oṅ, do eni gēnjētayaxēn gēr bamene band šabucara, mēṅ ar sēra babi eni dind oñandi odexēm an.

3

End bakey bapelatar eṅ

¹ Wēj Timote, nangēl wa mēne gēr bakey bapelatar, mbaṅ kē yēka.

² Gayikwa bela bēn axwēj kēni xwēj, do eni gi bēhan bēr kodī. Afufēnara kēni ŷana eni pufēnarand, do eni dafēnarand. Ašir kēno ŷana eno cirēnd Kaxanu, do enēbi mēšenēnd bēxarēk bērebēn bēn. Ašus kēni ŷana eni cusēnd bend Kaxanu beṅ, do ado ebi din ala enjekax ano ŷana na eno cēkwand.

³ Owēkw orebēn oṅ mbaṅ kē farēdadī xali eni gi gē axaṷēnan kēm, bērena, bēr gē anjus kēm, bēxeṷax, bēr šusēk enjekax.

⁴ Ayaxēta kēnēbi ŷana enēbi yaxētand bērebēn bēn, do eni gi xoṷēt xoṷēt. Ndafēnan indebēn iṅ kēbi šiwēn, do eni ṅan bendebēn beṅ nēmēc Kaxanu.

⁵ Aliya kēni ŷana eni dīyand nangēde bēr xwēta kējo Kaxanu fo, xarak gēr owēkw orebēn aṅp hēp kēni panga ind ekwēta iṅ. Ata nacētalēbi caw bela bērako rako bēn.

⁶ Şêf gër bela bėjo exëni, bër kē lilënd gër bëciw̃ do kënëbi yifand bësoxari bësitarak gër ekwëta bën, bësoxari bër wër këbi beñëñenax bën, bësoxari bër kē sêfënd oñandi od ex yo.

⁷ Bësoxari bėjo din këni sëyand, bari din ani korënd na eni nang d'al in.

⁸ Ang bani ñëpënd Yanes gē Yambëres end Moyis ak, bër kē sëyalind benëgwêş bën mon-dako fo këni ñëpënd eni kwëta d'al in[☆]. Ata bėjo bër gē onden otëmbak exëni, do ekwëta edebën el dek yepëk.

⁹ Barikan enëgwêş end bela bėjo eñ dek kē fëlëtar, ang ebax end Yanes do gē Yambëres ak. Ala ax bo na ga këbi baxët.

End aniyān and Pol eñ

¹⁰ Wēj cëñ, aye sêf këy er këme sëyalind in, bëte aye wat këy ang wëlaya këme ola oram ak. Anang nang këy bebër këme fënand me di bën. Anang nang këy bëte ekwëta edam el, ebuña ed buña këme el, ang ke balënd end bela ak, ang xemëna këme ak.

¹¹ Anang nang këy bëte ang narëndëra këne ak, do ang soro këme gër angol and Añëcoş, gër and Ikoñom, do gër and Lisëtër ak. Bëte toro ind fe bayik ame buña ex na? Barikan Axwën an din ke racëtënd gër toro ind ex yo.

¹² Dek bër këbi yandind eni dīya ang këjo yapanënd Yesu Kërisët ak bën, arixëra kënëbi yāna enëbi dixërand.

¹³ Barikan bëyëñenax bën, gē bëyifa bën din këni yāna eni mendërand do eni basënd

[☆] **3:8 3.8** Andocane 7.11-22

eñëñenax eñ, enëbi nambelind bëshëxe ang nambëra këni bën ak.

¹⁴ Barikan wëj, bayil ga xwëtaya këy bend sëya këy do fëni ki mëne ðal dëñ ex beñ, ga nang këy ako noño sëyali ki.

¹⁵ Elod inëmëta ga nang këy wa Oñëgw Omënëk ok. Awa Oñëgw Omënëk oko fo kë xor exi yël orenik ol, ey cotaxën apexa and këbi yëlënd Yesu Kërisët bër xwëta këño añ.

¹⁶ Oñëgw Omënëk od ex yo gër Kaxanu xaniwëk do ofëcak or kë wëlawënd ol ex: osëyali ol, gë ewërëšët ed bër kë lifënd el, gë edebët ed bësëmbak el, gë ekadac ed gër or šenene el,

¹⁷ exo gixën ala ar wëk end Kaxanu an, ar kë xorënd exo di enjekax end ex yo.

4

End epemëra ed Atëfëtan eñ

¹ Awa Timote, gër lëngw ir Kaxanu do gë ir Yesu Kërisët, mëñ ar kë bakaw ebi kiti bela an, hi këni bëshëngw, hi këni bëshësëk, këmi xarand gë obal osëm. Axara këmi xarand në end akey and ko bakaw eñ, në end owun orexëm eñ,

² pemërayind Atëfëtan añ, deyarayind nand ex yo, saxan ki nde, lakan ki nde. Wërëšëtindëbi bela bën, dexërayindëbi, kemëningdëbi, bujanindëbi and këyëbi sëyalirand añ.

³ Gayikwa në eyow ex amëd and bela bën abi ñana na ebi ñandind or osëyali or ðal ol. Ga këbi ýana ebi kanjënd ebaxët ed oñandi odebën el, ašala kënëbi ýana enëbi caland bësëyali bër bësëyali.

⁴ Banëf bandebën ban këni ñawëтали гë dal in, do eni kwënda obaxët or bendacan.

⁵ Barikan wëj, gil гë anjus гër beÿ dek, buñayind ado ey torond, pemërayind Atëfëtan añ, balëkënalıyind andıyen and fana ki Kaxanu añ.

⁶ Wëno cëñ, anëka hi këme ang eşëb-ceb ir këni xoşënd në şadaxa fo, do oñe ondam oñ dëñ ñatëguk mondako.

⁷ Anëka xaxër këme okaxër ond ÿap bax me kaxër oñ, añata ñata këme andıyen andam añ, do aye wëlaya këme ekwëta ed xwëta këmo Kërisët el.

⁸ Ata elod гëрегako, acosa and or şenene and fenin ke añ, Axwën Yesu, mëñ ar ex axiti ar şenene an, ayël ke yëlëd yatir akey apelatar. Ayël këbi yël bëte bër ñan këño do këno şëninđ exo bakaw bën, axi gi ex na wëno fo.

Bepelatar beñ

⁹ Kemënal ey yow aÿand ro гër ed hi këme.

¹⁰ Demas cëñ, aÿañëta ÿañëta ke gayik bend гë okey oko xëbënan këño nëmëc, kwël ye ko de гër Tesalonik. Këresañës aye ye ko гër ebar ed Galasi, do Tit, гër ed Dalëmasi.

¹¹ Luk gabat bayik ro гë wëno. Awa tëfëregudën гë Marëk and këy yowënd añ gayik mbañ ke rëcati гër andıyen.

¹² Alawën lawën këmo Tişik гër Efes.

¹³ And këy yowënd añ, mëlaliwëd ocud otëm ond sebëgu bame гër Tërowas, гër iciw ind Karëpos oñ. Mëlaliwëd bëte bakayëta ban, ad-ofa bakayëta band monëkw ban. ¹⁴ Alekësandër,

asap an, mbaŋ rixëra ke. Axwën an, aũaşën kënjo wũaşën bandixa bandexëm baŋ.

¹⁵ Wëj bëte kwëyëtalö gayik mongwërëna wërëna baxo ga xey kënjo osëyali orebi ol.

¹⁶ Yatir w̄ac ke añanar axiti an, gabatak ax yow bana exe d̄aŋëta: d̄ek şapëran bane. Bari Kaxanu kërëbi nöp na në eŋo.

¹⁷ Axwën an wa laŋëta baxe, do xemën ke, eni wëlxën Atëfëtan aŋ paß gë wëno, d̄ek benëŋ beŋ. Do Axwën an mondako racët ke gër etëy ed yëraŋ.

¹⁸ Aracët ke racët gër eñëjënax end ex yo, afexën ke fexën, do exe mëla yaŋ gër orën, gër ed wun ko. Duwanëjone mëŋ ar gë enjaran end din ir din an! Amen!

Ofelar ol

¹⁹ Aşëma këmëni şëmand Përisëka, gë Akilas do gë bër ekun ed Onesifor bën.

²⁰ Erasët cëŋ, gër Koreŋët bayiw ko, do Tërofim fo sebëgu këmo aşëxwëra gër Mile.

²¹ Kemënal ey yow d̄amana ex ŋatëgu ayem in. Ebulos, gë Pudeŋës, gë Linos, gë Këloja, do d̄ek bëmaŷe bëŋ ki şëmand.

²² Awa Axwën an gilexo gër onden ondey! Yelëleŋun oyekax orexëm ol!

Oniyan
Oniyan: Oniyan (New Testament+)

copyright © 2017 Wycliffe Bible Translators, Inc.

Language: Oniyan

Contributor: Wycliffe Bible Translators, Inc.

All rights reserved.

2025-04-29

PDF generated using Haiola and XeLaTeX on 29 Apr 2025 from source
files dated 29 Apr 2025

8b7902f3-5e35-5b89-86b2-c6da1be458b9